

第三部

事奉

Kah 真 chē 一般公民 (kah 一 koá 候選人) ê 想法倒 péng, 擔任政治職務並 m̄ 是 beh 行使權力, 卻是 beh 服務大眾; 這 m̄ 是叫別人去做咱 ài in 去做 ê tāi-chì, 卻是為別人做 in 需要咱為 in 做 ê tāi-chì。這種想法 tī 「我先」 kah 「無惜成本 mā beh 領先」 ê 文化中, 真容易 hông bē 記得, m̄-koh, 咱忽視對別人的事奉, 咱自己 tiòh 付出真大的代價; m̄-nā tī 政治上, 甚至 tī 咱基督徒 ê 生活中, koh khah 是 án-ne。

身為彌賽亞 kah 上帝 ê Kiáⁿ, 耶穌比任何人 koh khah 有權來照祂 ài ê 去做, m̄-koh, 咱知基督 「m̄ 是 beh hō 人服事, 是 beh 服事人, koh 甚至犧牲家己 ê 性命來贖回真 chē 人。」(馬太福音 20:28)。想 beh hō 上主歡喜, koh 享受充滿活力 ê 生活 ê 基督徒, mā 會選擇事奉 ê 方式; 這是 tī 咱神聖 ê DNA 內面。基督徒 chit 字 ê 意思是 「小基督」, 而且耶穌叫咱 tiòh 模仿祂 ê 模樣, 「thang hō lín tòe 祂 ê 腳步」(彼得前書 2:21)。所以 tī chit 部分, 咱 beh 探討 「事奉」 tī chit-ê 深受傷害 ê 世界 ê 意義。咱 beh 認真思考耶穌 ê 模範; 討論公義 kah 無公義; 專注 tī 憐憫; chhōe 出 「基督 ê 使者」 ê 意思是啥物; 看創造力、幸福 kah 事奉 án 怎互相密切結連; 注意謙遜 ê 角色; 努力追求和平; 以及其他等等。

Chit 部分 kah chìn 前 ê 部分當然有一 kóa 重疊 (têng-tháh), 因為無人 tī 信仰上 ê 成長 kan-taⁿ 是 tùi 外面吸收 niā-niā; 當 thèh 入來 ê kah 付出去 ê 達到平衡 ê 時, 信仰 tòh 會成長。大多數 ê 時間, 咱 ê 「付出」是用事奉別人 ê 方式來達成。上帝設計咱來事奉(永遠是 thang 歡喜 ê), 而且當咱完成咱 ê 神聖設計 ê 任務 ê 時, 咱注定會得 tiòh 最終 ê 報賞。想像耶穌 tī 歷史終結 ê 時, 對咱講 chiah-ê 話: 「真好, 好 koh 盡忠 ê 奴僕, 你既然 tī 小小 ê tāi-chì 盡忠, 我 beh 派你來管理大 ê tāi-chì。入來 kah 我做伙快樂。」(馬太福音 25:21)。